

GJYKATA E APELIT E KOSOVËS NË PRISHTINË, në kolegjin e përberë nga gjyqtarët Lumni Sallauka - kryetar i kolegjit, Rafet Haxhaj dhe Frosina Sylejmani, anëtar të kolegjit, në çështjen juridike kontestimore të paditëses PTK- Prishtinë, të cilin e përfaqëson i autorizuari av. XH.B., kundër të paditurit A.S. nga Mitrovica, me objekt të padisë pagesa e borxhit, duke vendosur sipas ankesës së paditurit A.S. e paraqitur kundër aktgjykimit të Gjykatës Themelore në Mitrovicë C.nr.202/10, të datës 25.07.2013, në seancën e kolegjit të mbajtur me datë 16.05.2018, mori këtë:

A K T G J Y K I M

REFUZOHET si e pa themeltë ankesa e paditësit A.S. nga Mitrovica, ndërsa aktgjykimi i Gjykatës Themelore në Mitrovicë C.nr.202/10, i datës 25.07.2013, **VËRTETOHET**.

A r s y e t i m

Gjykata e shkallës së parë, me aktgjykimin e atakuar C.nr.202/10, të datës 25.07.2013, në pjesën e parë të dispozitivit e ka obliguar të paditurin që brenda afatit prej 15 ditëve nga dita e marrjes së këtij aktgjykimi t'ia paguaj paditëses shumën prej 536,74 euro, në emër të borxhit, me kamatë vjetore që paguhet në lartësinë e mjeteve të deponuara në bankat afariste pa destinim të caktuar nga data e parashtrimit të padisë e deri në pagesën definitive, nën kërcënim të përbarimit të dhunshëm, ndërsa me pjesën e dytë të dispozitivit është obliguar i padituri që në emër të shpenzimeve procedurale, t'ia paguaj paditëses shumën prej 15 euro në afat prej 15 ditëve, më gjerësisht sikurse në aktgjykimin e atakuar.

Kundër këtij aktgjykimi i padituri në afat ligjor ka paraqitur ankesë duke e atakuar aktgjykimin e goditur për shkak të vërtetimit të gabuar dhe jo të plotë të gjendjes faktike, me propozim që të aprovohet ankesa e të paditurit ndërsa aktgjykimi i atakuar të priset dhe lënda t'i kthehet gjykatës së shkallës së parë në rigjykim dhe rivendosje, ose aktgjykimi i atakuar të ndryshohet ashtu që të refuzohet në tërësi si e pabazuar kërkesëpadia e paditëses.

Paditësja nuk ka paraqitur përgjigje në ankesë.

Gjykata e Apelit si gjykatë e shkallës së dytë, pas vlerësimit të pretendimeve ankimore lidhur me aktgjykimin e atakuar, në mbështetje të dispozitës së nenit 194 dhe 195 të Ligjit për Procedurën Kontestimore (LPK), ka gjetur se:

Ankesa e të paditurit është **e pabazuar**.

Nga shkresat e lëndës rezulton se me datë 27.09.2010, në Gjykatën Themelore në Mitrovicë, paditësja ka paraqitur padi kundër të paditurit për shkak të borxhit në emër të shfrytëzimit të shërbimeve të telefonisë mobile, në shumën prej 536,74 euro me kamatë në lartësi prej 3,5 %, duke e llogaritur atë nga dita e parashtrimit të padisë e deri në pagesën definitive, nën kërcënim të ekzekutimit të dhunshëm.

Në procedurën sipas padisë gjykata e shkallës së parë ka caktuar seancën e shqyrtimit kryesor dhe pas administrimit të provave siç janë: kontrata mbi pagimin e borxhit me këste e

datës 23.10.2009, historiatin e pagesave dhe bilancin financiar të paditurit të datës 16.09.2010, ka marrë aktgjykimin e atakuar me të cilin e ka detyruar të paditurin që t'ia paguajë borxhin paditëses në shumën prej 536,74 euro. Në arsyetim të aktgjykimit gjykata ka theksuar se i padituri në seancën e shqyrtimit kryesor nuk ka qënë prezent edhe pse është ftuar në mënyrë të rregullt dhe mungesën e tij nuk e ka arsyetuar, ndërsa me provat e administruara ka rezultuar se i padituri i ka shfrytëzuar shërbimet telefonike të ofruara nga paditësja dhe në këtë drejtim ekziston detyrimi i të paditurit në pagesën e borxhit ndaj paditëses.

Gjykata e Apelit nisur nga kjo gjendje e çështjes vlerëson së qëndrimi dhe përfundimi juridik i gjykatës së shkallës së parë është i drejtë dhe i ligjshëm, pasi që aktgjykimi i atakuar nuk është i përfshirë në shkelje thelbësore të dispozitave të procedurës kontestimore nga neni 182 paragrafi 2, pika (b), (g), (j), (k) dhe (m) e LPK-së dhe se e drejta materiale është zbatuar në mënyrë të drejtë, për të cilat shkaqe Gjykata e Apelit kujdeset sipas detyrës zyrtare në kuptim të dispozitës së nenit 194 të LPK-së, ndërsa pretendimet tjera për shkeljet e dispozitave të procedurës kontestimore nga ana e ankueses nuk janë paraqitur.

Nuk qëndrojnë pretendimet ankimore për shkeljet që i referohen gjendjes faktike pasi që gjykata e shkallës së parë në procedurën e të provuarit ka administruar provat e paraqitura nga palët ndërgjyqësore me të cilat ka vërtetuar gjendjen faktike të përshkruar si në arsyetim të aktgjykimit. Në arsyetim të aktgjykimit gjykata e shkallës së parë i është përmbajtur dispozitës së nenit 160 paragrafi 4 i LPK-së, në atë mënyrë që ka përshkruar kërkesat e palëve, faktet që kanë parashtruar palët, provat e propozuara dhe të administruara, si dhe mënyrën se si janë vlerësuar provat e administruara.

Sipas vlerësimit të Gjykatës së Apelit, qëndrimi dhe përfundimi juridik i gjykatës së shkallës së parë për themelësinë e kërkesëpadisë është i drejtë dhe i bazuar, pasi që me dispozitën e nenit 148 paragrafi 1 të LMD-së (i vitit 1978) përcaktohet se *"kontrata krijon të drejta dhe detyrime për palët kontraktuese"*, ndërsa me dispozitën e nenit 262 paragrafi 1 parashihet se *"kreditori në raportin e obliguar është i autorizuar që prej debitorit të kërkojë përmbushjen e detyrimit, ndërsa debitori ka për detyrë ta përmbushë me ndërgjegje krejtësisht sikundër është përmbajtja e tij"*. Në kuptim të këtyre dispozitave rezulton se gjykata e shkallës së parë me të drejtë e ka gjetur si të themeltë bazueshmërinë e kërkesëpadisë. Gjykata e Apelit e pranon si të drejtë edhe qëndrimin juridik të Gjykatës së shkallës së parë, për sa i përket gjykimit të kamatës ligjore, përkatësisht lartësisë dhe kohëzgjatjes së saj, pasi që e njëjta është gjykuar në përputhje të plotë me nenin 277 paragrafi 1 të LMD-së.

Nga arsyet e cekura Gjykata e Apelit, gjeti së gjykata e shkallës së parë në mënyrë të drejtë dhe të ligjshme ka vendosur në këtë çështje juridike, prandaj në mbështetje të dispozitave nga neni 194 dhe 195 paragrafi 1 pika (d) e lidhur me nenin 200 të LPK-së, u vendos si në dispozitiv të këtij aktgjykimi.

GJYKATA E APELIT E KOSOVËS NË PRISHTINË
Ac.nr.297/14, datë 16.05.2018

Kryetari i kolegjit,
Lumni Sallauka